

RAHSIA AL-QURAN – DARI SEGI ILMU DAN FALSAFAH

ORANG-ORANG YANG BERIMAN: TAHAN MENERIMA UJIAN!

Orang-orang Islam kita yang terpedaya dengan baka keturunan sebagai orang Islam dan yang tidak sanggup menderita serta tidak sudi berkorban, seyogianya memikirkan dengan tenang akan kandungan kitab Allah yang diperturunkan di bawah ini:

“Amhasibtum an tadkhulū al-jannata walammā ya'tikum mathal al-ladhina khalū min qablikum massathum al-ba'sa'i wa al-ḍarrā' wazulzilū hattā yaqūl al-rasūl wa al-ladhīna amanū ma'ahu matā naṣrullah, illā inna naṣr Allāhi qarīb.” 214, al-Baqarah.

(oleh Abdullah Basmeh)

Ertinya: “Adakah kamu kira, bahawa kamu akan masuk syurga, dan tiada akan datang suatu (ujian) kepada kamu sebagaimana yang telah datang kepada orang-orang yang terdahulu daripada kamu, iaitu mereka ditimpa kepapaan dan penderitaan, dan mereka telah bergegar iman mereka kecemasan, sehingga rasul dan orang-orang yang beriman yang besertanya berkata: “Bilakah tibanya pertolongan Allah? Ketahuilah! Bahawasanya pertolongan Allah hampir akan tiba.”

Al-'Allamah al-Sayyid Rashīd Riḍa telah mentafsirkan ayat ini dengan lanjut katanya: ayat suci ini adalah ditujukan kepada sahabat-sahabat Rasulullah SAW – orang-orang Islam yang pilihan. Ayat suci ini seyogianya menjadi sebesar-besar iktibar dan pengajaran bagi orang-orang Islam yang datang kemudian daripada itu, yang menyangka bahawa oleh sebab mereka telah memeluk Islam maka mereka akan berhak masuk syurga dengan mudah sahaja. Padahal mereka jahil akan “sunnatullah” (peraturan yang telah ditetapkan Allah) yang berjalan atas orang-orang yang mendapat hidayah iaitu mereka tidak sunyi menderita berbagai-bagai tindasan dan penganiayaan yang ditimpakan atas mereka itu ketika mereka tampil ke hadapan mempertahankan kebenaran dan memimpin orang ramai.

Sungguh menakjubkan, apabila difikirkan hal umat Islam yang kitab sucinya al-Quran mengandungi keterangan yang jelas bahawa “peraturan Allah” yang berjalan atas tiap-tiap makhluknya hanya satu jua, tidak bertukar ganti. Kitab suci al-Quran menuntut manusia umat Islam mengambil iktibar daripada “peraturan Allah” itu dan menuntut mereka keluar mengembara di bumi bagi mengetahui kesan-kesannya pada umat-umat dahulu kala yang telah hilang lenyap dan umat-umat yang ada sekarang ini.

Malangnya sebahagian daripada orang-orang Islam, kedapatan mencuaikan soal ini lalu membantah pula akan orang yang memberi nasihat dengan kejadian yang telah diceritakan oleh Allah berkenaan umat-umat dahulu kala yang telah kufur akan nikmat-Nya. Kepada orang yang memberi nasihat mereka berkata, kononnya orang itu mengkiaskan perihal orang-orang kafir atas orang-orang Islam.

Banyak ayat-ayat suci yang menggambarkan penderitaan orang-orang yang beriman yang sebenar-benarnya dalam mempertahankan iman mereka dengan menahan berbagai-bagai penganiayaan yang ditimpakan atas mereka, seperti firman Allah Ta'ala:

“Am ḥasibtum an tadkhū al-jannat walammā ya'lam Allāh al-ladhīna jāhadū minkum waya'lam al-ṣābirīn” 142, 'Āli 'Imrān.

Ertinya: “Adakah kamu kira, bahawa kamu akan

masuk syurga, (dengan begitu mudah), dengan tiada menguji oleh Allah akan orang-orang yang berjihad di antara kamu dan mengetahui orang-orang yang berhati sabar.”

Dan firman-Nya lagi di dalam surah al-Ankabut 1-2:

“Aḥasiba al-nāsu an yutrakū an yaqūlū amannā wa hum lā yaftanūn. Wa laqad fatanna al-ladhīna min qabilhim fa liyd lamanna Allāh al-ladhīna sadaqū wa laya lamanna al-kādhībīn.” – Ilā qauluh – “wa min al-nās min yaqūlu amannā bi illah faidha ‘ūdhi fi Allāh jatala fitnat al-nās ka ‘adhāb Allāh”


Ertinya: “Adakah manusia itu mengira, bahawa mereka akan dibiarkan sahaja berkata: “kami telah beriman” dengan tiada mendapat cubaan daripada Tuhan? Sesungguhnya telah kami (Allah) cubai orang-orang dahulu kala sehingga Allah mengetahui orang-orang yang sebenarnya beriman dan orang-orang yang berdusta.” -sehingga firman-Nya- “Di antara manusia ada orang yang berkata: Kami telah beriman kepada Allah”. Tetapi apabila ia disakiti (ditindas dan dianiaya), maka terus ia menyamakan kesakitan dari manusia dengan siksa Allah...”

Kesemua ayat-ayat ini dan yang seumpamanya adalah menyokong ayat yang menjadi maudhu‘ tafsir ini yang tertera di atas iaitu menggambarkan cubaan Allah kepada orang-orang yang beriman dengan sebenar-benarnya. Yang menyeru kepada kebenaran. Tetapi malangnya kebanyakan orang-orang Islam yang membaca atau yang dibacakan ayat-ayat ini kepada mereka, kedapatan sentiasa alpa dan lalai daripada memahaminya yang sebenar, dan kerana itu bukan sedikit di antara mereka yang mengambil faham yang salah, dengan mengatakan kononnya orang-orang yang mempertahankan kebenaran yang pernah ditimpa kemalangan dan disakiti dengan perkataan dan perbuatan, maka segala yang menimpa itu adalah menjadi dalil atasnya sebagai seorang salah, yang tidak menuntut kebenaran!

Sungguh jahilnya golongan yang tersebut dengan kitab Allah.

Dan sungguh jauh terbabas mereka daripada mengetahui “peraturan” yang telah ditetapkan Allah, serta sungguh lalainya mereka mentakwilkannya kepada segala makhluk Allah.

Kebanyakan orang Islam telah membelakangkan ajaran al-Quran, dikecualikan setengah daripada “surah-surahnya” yang diperlagukan pada hari-hari keramaian. Inilah yang menyebabkan hilang lenyapnya roh agama selain daripada upacara-upacara yang dilakukan dengan hatinya di sana sini. Upacara-upacara agama yang tersebut dilakukan oleh raja-raja dan pembesar-pembesar semata-mata kerana mengabui mata orang-orang awam, dan kerana kedapatan mereka itu menindas orang-orang yang insaf yang mengajak mereka berpegang kepada ajaran kitab Allah. Mereka pun menggunakan pengaruh ‘alim ‘ulama rasmi yang telah dilimpahkan dengan sara hidup dan pangkat kebesaran supaya jiwa orang ramai tidak berpaling kepada kitab Allah dan sunnah Rasul-Nya. Perbuatan serong inilah – menurut sangkaan mereka – akan menjadikan kedudukan mereka kukuh, tidak bergoncang!



Presiden Sukarno sedang memberi ucapannya kepada pegawai-pegawai polis lalu lintas (trafik) yang telah lulus di dalam peperiksaan baharu-baharu ini di Jakarta – gambar Airpost.